

Regional News Unit AIR Aizawl  
Tuesday, June 11, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Chief Minister Pu Lalduhoman kalphung thar, mipui sawrkar din kawngah sawrkar hnathawkte chu sawrkar inngahna ruhrel an ni, a ti.
- Mizoram Chief Information Commissioner, Pu John Neihlaia chuan dan hmanga langtlang taka rorel a nih theihnan Local Council te an pawimawhna hle a ti.
- Nizan khan sawrkar laipuia Minister te hna chanpual puan a ni a, Ministry lian pali ah inthlakna a awm lo.

<><><>

### CM

Chief Minister Pu Lalduhoman kalphung thar, mipui sawrkar din kawngah sawrkar hnathawkte chu sawrkar inngahna ruhrel an ni, a ti.

Nimin khan Chief Minister Pu Lalduhoma hovin Minister te, Advisers to CM te leh Mizoram sawrkara Jt. Director chin chunglam zawng zawng leh DC leh SP zawng zawng te telna Inter Departmental Meeting Dawrpui Multi Purpose Hall ah neih a ni a, he hunah hian thusawiin Chief Minister chuan tuna an kal mek dan aia tha zawk kal dan tur hria an awm phawt chuan ziakin a hnenah thlen se a ti a. Mizoram First tih chu an thupui a ni a, thil tha lo hnawl ngam, a tul huna "No" ti ngam an mamawh a ti.

An sawrkar chuan mipuite aw ngaihthlak zel a duh avangin "Mipui Aw" online an nei a; CM office atangin an vil reng a, a mawhphurtuten tha takin kalpui se a ti a. Eirukna tihbo an duh a, sawrkar hnathawk leh consultancy firm inthural te, supplier thuralpui neih te eirukna bul a ni fo a, an khauh hle dawn, a ti a. Sawrkar hnathawkten Annual Property Returns a hun takah file ngei ngei tur a ni a, a tel lovin vigilance clearance an pe dawn lo a ti bawk a. Hnathawh quality tha chauh neih an tum avangin Project Monitoring Committee chak tak an nei a, officer zawng zawng ten tha takin an thawhpui a ngai a ni a ti.

Departmental work reng reng a changtu Minister phalna la hmasa lova thawh phal a ni lo tih Chief Minister chuan a sawi a. Department ten eng project pawh kalpui tum se Planning leh Finance department kaltlang lova proposal thehluh phal a ni lo a. K deposit ah pawisa dah a tam em em a, kum 3 leh a aia upa k deposit reng reng department ten ching fel thuai turin an duh tih a sawi bawk.

Sawrkar hnathawk semrual dan pawh an dap mek tih Pu Lalduhoma chuan a sawi a, allocation of business pawh siam that an tum a. Service inepna nasa lutuk chuan thawhhona a tichhe nasain an hria tih a sawi a ni.

He hunah hian Chief Secy Dr. Renu Sharma, chuan Sawrkar thar duhdan leh hmalakna te, a ruahmanna tlangpui te a sawi a. Sawrkar hnathawk kal tura beisei te tha takin an kal tih a sawi bawk a ni.

<><><>

Aizawl Municipal Corporation-a eptu party Corporator-te chuan AMC-a rorel lai MNF Sorkar chu rorel tlak a an ngaih loh thu an sawi.

He thu hi nimina Aizawl Press Club-a chanchinbu mite an kawmna ah ZPM leh Congress Corporator te chuan AMC-a MNF Sorkar chu cheng vaibelchhe hnih chuang man khawl hman tlak loh leiah an puh a, kum 2023-2024 a AMC budget pumpui atangin AMC-in a thawhchhuah ve tur chu za a 10 a nih thu an tarlan bakah za a 90 vel chu 15th Finance Commission hnuuia Urban Local Body grant leh Mizoram Sorkar atanga grant in aid lo kal a nih thu an sawi a, AMC-in sum a thawhchhuah belh a, a intodelh ve theihna tur lam ngaihtuah a, hmalam hun atana inruahman aiin thil te tham te te a party mi leh sa invulh a induhsak an thlang zawk an ti bawk.

Eptu lam Corporator-te chuan kum 2021 atanga kum 2024 chhunga party mi leh sa invulhna atana hna te reuh te te an pek chhuah zat chu a sumin cheng vbc 30 nuai 92 sing 3 & 2,050 ni a an tarlan bakah Aizawl mipuiten AMC an dawr zinna ber - in sak, lei laih leh dawr hawn dilna te chu a thang rei thin tih sawiin, Solid Waste Management Centre, Tuirial-a bawlhhlawh inchhek khawm tam lutuk tih ziaawm na atana Mizoram Sorkar atanga an dawn, cheng vaibelchhe 2.74 atanga bawlhhlawh hal ralna khawl Hyderabad atanga an lei chu bun a nih atanga mumal taka hna a thawh theih loh nghal thu an sawi a, AMC budget-ah property tax hmuh zat tarlan thin a nih laiin, a hmanna lam tarlan a nih ngai loh thu leh Aizawl mipuite sum thawhkhawm property tax chu a hmanna kimchang mipuiten an hriat ngei a tul thu an sawi bawk.



#### MIZORAM BJP

Mizoram BJP President Pu Vanlalhmuaka chuan Sorkar laipui a BJP sorkar thar chu kum nga chhungin anmahni thlawptu te nena chak takin ro an rel ang a ti.

Aksahvani News Aizawl zawhna chhangin Pu Vanlalhmuaka chuan, Mizoram sorkarin Sorkar laipui a dawr thiam leh thiam loh a zirin Mizoram tan sorkar laipui chu a tangkai thei a ni tih a sawi a, Mizoram sorkarin State danga tual to party ten Sorkar laipui an thawhpui a hma an sawn pui mek angin Sawrkar laipui chu thiam taka Mizoram tan a tangkai turin thawh pui thiam se a duh thu leh NDA neitu chu BJP a nih thu chiang taka hre thiam tura Mizoram sorkar inhawng tura a duh thu a sawi.

Pu Vanlalhmuaka chuan BJP chu an in hawn reng thu leh Mizoram BJP chu Mizoram, Mizo hnam leh Mizote mamawhna ang a thawk tura awm an nih thu a sawi bawk.

Pu Vanlalhmuaka hi Prime Minister Narendra Modi lakluhna inkhawm New Delhi-a neih ah Siaha Bialtu MLA Dr. K Beichhua, Palak Bialtu MLA Pu K. Hramo leh Mizoram BJP hruaitu te nen an tel a ni.



CIC

Mizoram Chief Information Commissioner, Pu John Neihlaia chuan dan hmanga langtlang taka rorel a nih theihna atan veng tin a Local Council ten pawimawhna nasa tak an nei, a ti.

He thu hi nimina Aizawl Vanapa Hall-a Mizoram Information Commission-in Local Council-te pual a RTI Act 2005 leh The Mizoram RTI Rules inzirtirna huna buatsaih-ah sawiin Chief Information Commissioner chuan Local Council-te chu veng mipui thlan tlin, mi puitling tak, vengchhung mipuite'n harstana an neih a an tluk luh thin na an nih thu a sawi a, veng tin a Local Council Chairman leh khaw tin a Village Council President-te chu RTI hnuai State Public Information Officer-atan kum 2023 August thlaa sorkar thuchhuakin a nem ngheh thu leh Municipal Commissioner bakah district tin a DLAO te chu a khaikhawmtu an nih thu a sawi.

Pu John Neihlaia chuan RTI dan chu khawvel huap ang pawh a dan tha pawl tak a nih thu te leh India rama RTI dan zam a nih theihna atan mi thahnem ngai tak takten chaw an nghei mai bakah nawrhna an huaihawt thu te a sawi a, India ram chu British dan zam rochun zel ram a nih angin sorkar kalphung pawh a mi nawlpui tan hriat a harsat thin thu leh chung dan awm sa te chu RTI-in nasa taka a rawn thiah thu a sawi.

Mizoram Information Commission hi kum 2006 June thla a din a ni a, thawktu 30 an awm mek a, Kum 2006 June thla atanga kumin kum 2024 June ni 7 thlenga RTI dan hmanga zawhna 30069 a awm thu leh complaint 464 a awm a, Online kaltlanga RTI zawhna pawh kum 2022 July thla atanga India rama a pariatna atan Mizoram Information Commission-in a tlangzarh a ni.

He hunah hian, Information Commissioner Pu Mangjangam Touthang leh Mizoram Information Commission Secretary Pu H. Dolianbuaia pawh an tel a ni.

<><><>

SERCHHIP

Serchhip Sub-Hqrs YMA hnuai Comt. pêng, Vigilance & Monitoring Committee chuan nimin khan Serchhip Chanmari Veng-a DIET Hostel sak lai chu an tlawh a. YMA te hian DIET Hostel, tun thlenga sak zawh a la ni lo chu an hre thiam lo tih sawiin Chief Minister, Bialtu MLA ni bawh hnenah hemi chungchang hi ziaka thlen an tum thu an sawi.

Diet Hostel hi Samagra Shiksha Mizoram(2019-2020), PAB Fund atanga sak niin, cheng vbc 2 leh nuai 15senga sak tura ruahman a ni a. Kum 2021 atanga sak tan tawh niin, a sak zawh hun tura tih hi Covid-19 hri avanga sawn hlat a nih hnuah; January, 2023-a sa zo tura tih a ni a. Mahse, tun thleng hian sak zawh a la ni ta lova. Tun dihmuna hian luah theih tura peih fel tur meuh chuan hna hi thawh tur a la tam hle niin YMA hruaitute chuan an sawi.

He Building sak hna hi a thawktu, Contractor chu Allied Concern te niin, a satu tak erawh chu mi dang an ni thung a. Tunah hian he hna enkawltu hian sum a awm loh avanga hna hi chhonzawm thei lo nia sawi a ni a, hetih lai hian he building hi sak hmabak a la tam hle thung a ni.

Sub Hqrs YMA Vigilance & monitoring committee te hi Sub hqrs YMA Serchhip President Pu Kawlthua'n a ho a, nimin vek khan Thenzawla Sangha dahkhawmna tur Fish Brood bank sak mek pawh tlawhin, sum ruahman ₹ nuai 380 atanga chhutin a tha tawh lo niin an hria a. Mizoram state project monitoring committee ah thlen an tum bawh.

<><><>

## CABINET

Nizan khan sawrkar laipuia Minister te hna chanpual puan a ni a, Ministry lian pali ah inthlakna a awm lo.

Sawrkar hmasa ang thoin Rajnath Singh-a chu Defence Minister a ni chhunzawm dawn a,hetiang bawk hian Amit Shaha'n Union Home Ministry leh Cooperation a chang leh ang a, Union Finance Minister atan Niramala Sitharaman dah nawn leh niin External Affairs Ministry pawh sawrkar hmasa ang thoin Dr. S. Jaishankar chuan a enkawl chhunzawm ang.

Anni bakah hian sawrkar tharah hian Nitin Gadkari chuan Ministry of Road Transport and Highway chu a enkawl chhunzawm ang a.Piyush Goyal pawhin Ministry of Commerce and Industry a chang chhunzawm ang a, Dharmendra Pradhan pawhin Education Ministry a enkawl chhunzawm ang. Union Minister thar zingah JP Nadda chu Health leh Chemical and Fertilizers Minister a ni dawn a. Madhya Pradesh Chief Minister hlui Shivraj Singh Chouhan chu Agriculture leh Rural Development Minister thar atan ruat a ni a. Union Ministry of Information and Broadcasting enkawl turin Aswini Vaishnaw ruat a ni a, hei bakah hian Railway Ministry a enkawl tel bawk ang.

Haryana Chief Minister hlui Manohar Lal Khattar chu Ministry of Housing and Urban Affairs leh Power chang tura tih a ni a, Kiren Rijiju chuan Parliamentary Affairs a chang ang a, Union Minister hmeichhe pahnih zinga pakhat zawk Annapurna Devi chuan Women and Child Development a chang dawn a. LJP leader Chirag Paswan chu Food Processing Industries Minister thar tur niin Jyotiraditya Scindia'n Communications leh DoNER Ministry a enkawl thung a.

BJP thawhpui JD (S) hruaitu HD Kumaraswamy chu Heavy Industries Ministry leh Steel Ministry chang tura tih a ni a. Bihar Chief Minister hlui Jiten Ram Manjhi chu MSME Minister atan dah a ni a, Assam CM hlui Sarbananda Sonowal chuan sawrkar hmasaa a lo enkawl tawh Port, Shipping and Waterways Ministry a enkawl chhunzawm ang. JD (U) hruaitu Rajiv Ranjan Singh chuan Panchayati Raj a enkawl ang a, Pralhad Joshi chuan Consumer Affairs a enkawl ang.

Textiles Ministry chang turin Giriraj Singh ruat a ni a, Bhupender yadav chuan Environemtn Ministry a chang ang a, Hardeep Singh Puria'n Petroleum Ministry a enkawl ang a, Mansukh Mandaviya chu Labour and Sports Ministry enkawl tura tih a ni bawk a. Arjun Ram Meghwal chu Law Ministry chang tura tih niin G Kishen Reddy chuan Coal Ministry a enkawl ang a, Civil Aviation chang turin TDP leader Rammohan Naidu ruat a ni bawk.

<><><>